

Nus essan er ils auters

Radiotelevisiun Svizra Rumantscha

DA GION NUTEGN STGIER/ANR

■ **Dasper ils quatter films davart sis umens impurtants da l'istorgia svizra che vegnan emess da tuts quatter chanals da la SRG SSR s'occupa Radiotelevisiun Svizra Rumantscha il mais da november dentant er cun personalitads istoricas da noss chantun e cun nossas atgnadats.** Il project communabel dals quatter chanals da la SRG SSR duai dar las respostas a las du-

mondas, danunder vegnin nus, tgi essan nus e nua giain nus? Radio e televisiun, en tut las linguas naziunalas sa fatschentan cun quellas dumondas en il mais da november. Per dar las vairas respostas porschan radio, televisiun ed ils servetschs online in program multifar e quai en tut las regiuns da noss pajais. La finamira da quella collavuraziun cuminaivla che custa a la SRG SSR bunamain sis milliuns francs è d'animar il public e l'auditori da sa fatschentiar pli

profund cun l'atgna istorgia e cun projects naziunals e regiunals. Ils protagonistas dals quatter films che vegnan emess da tuts quatter chanals da la SRG SSR èn las suandantas figuras marcantas da nossa istorgia svizra: Werner Stauffacher, Clau da Flia, Hans Waldmann, Guillaume-Henry Dufour, Alfred Escher e Stefano Francini. A chaschun da la preschentaziun dal project naziunal ha *Roger de Weck*, il directur general da la SRG SSR, accentuà che

per il futur da la Svizra saja er impurtant d'enconuscher er il passà. Durant il mais da november tematisescha SRG SSR dentant er l'avegnir da noss pajais cun purtretar giuvenis talents svizzers che vivan en l'exteriur sin tschintg continents. Quels purtrets chattais vus sin quella adressa: swissinfo.ch.

In vast program

Radiotelevisiun Svizra Rumantscha preschenta ed inscenescha en connex cun il tema «Die Schweizer – Les Suisses – Gli Svizzeri – Ils Svizzers», la vita da personalitads istoricas, lur operar e lur temp. Las personas selecziunadas represchentan process impurtants, midadas e constantas da l'istorgia grischuna. En il focus stattan per exempel Selina Chönz ed Alois Carigiet. RTR sa fatschenta dentant er cun la dumonda pertge tutgan la turta da nuschs, ils capuns ed ils capricorns tar noss mobigliar spiertal e tar quels dals auters? Tge capita sche vischnancas fusiunan a vischnancas grondas, er quai è in tema durant il mais da november che stat tar RTR sut il motto «Nus – quai en ils auters». Ultra da quai vul RTR er procurar per il pli grond album da fotografias e perquai duajan tuts Rumantschs tarmetter lur fotografias en furma digitala a RTR. Sentiments d'identitad sveglian dentant er bleras chanzuns rumantschas profanas, da hip hop e schizunt da schlaggers populars. Per RTR ina raschun d'introduir per il mais da november l'emissiun «Limni rumantsch». Or dal «Kikeriki6» daventa il mais da november il «KikerikiSuisse», cun anc dapli dumondas da quai che curra e passa en noss pajais. Quai be ina schelta da las emissiuns spezialas emessas da RTR en il mais da november. Dapli dal program chattais vus sin la pagina d'internet rtr.ch.



Stefano Francini (san.) l'iniziant da la Scola Politecnica federala ed Alfred Escher, il pionier da la viafier.